

COMUNICATO n. 3690 del 06/12/2025

Manà fora su Trentino Tv l program l vegn endrezà dal Comun General de Fascia

“Pedies”: en sabeda ai 06 de dezember vegn fora la puntata #515 del program ladin per la television

[Ladino] Ence chesta setemèna l é a la leta l nef appuntament de “Pedies”, rotocalch ladin de informazion, ruà a la puntata n. 515. I argomenc che vegn portà dant te la puntata de chesta setemèna l é:

Rua Sèn Nicolò con agnoi e diaoi. Anter tema per i diaoi e legrezza per i dons, i bec i vif chest moment particulèr con gran sentiment e marevea ence amò anchecondi. Con vèlch rima e recorc da zacan conté da Giacomo Cincelli e Renato Soraruf conton de coche se speta l Sènt più benvolù de dut l an e de vèlch aspet che l é mudà tel temp. La Radunanza Generèla de la “Majon di Fascegn” che chest an la rua al cedeàn di 50 egn. Trè n filmat l é stat recordà la desvaliva scomenzadives metudes a jir fora per l an: Jandeluvio al Carnascèr Fascian, l seminarie sul Ladin Dolomitan, scontrèdes con outra mendranzes da duta la Tèlia e sessaben l lurier de la pèrt linguistica. Apede a la ativitèdes e ai projec, l é stat recordà e premià i presidenc, i colaboradores e i conseieres da dant con n don de recognoscenza. L é stat recordà ence l ex diretor Fabio Chiocchetti con n gran detelpai enceben che no l era prejent. La rejons é states portèdes dant te na letra leta ju da la ex presidenta Mirella Florian.

La Radunanza anuèla de l’APT de Fascia olache col bilanz, l President Fausto Lorenz e l diretor Nicolò Weiss te si referac i à portà dant argomenc e costion per capir olache sion e olache volon jir anter strategies e obietives neves. Te la Radunanza l é stat recordà i bogn ejic de la sajon passèda e coche Fascia se enjigna al invern che vegn de gra ence a impianc e investimenc neves ouc a ge sporjer ai ghes na perferida moderna e de bon livel per restèr sempetr al pas coi tempes.

N spetacol teatrèl per contèr de la Opzions che del 1938 à tocià la jent de lengaz todesch e ladin de noscia Region: na piata foscia de la storia de la valèdes ladines, ma con valores universèi e de valuta atuèi. Chest en curt l significat che la doi atores, Stefania Bogo e Francesca Satta Flores, les à volù portèr sun paladina con na raprezentazion leèda al liber de Luciana Palla dal titol “Opzioni Guerra e resistenza nelle valli ladine”. Chest spetacol l é stat portà dant te duta la valèdes ladines e a Cianacei l é stat en mercol ai 19 de november.

I reports de chesta setemèna i é stac enjigné e porté dant da Riccardo Zanoner e Angela Pederiva.

Metù a jir col sostegn del Comun General de Fascia, de la Provinzia autonoma de Trent e de la Region autonoma Trentin – Südtirol, “Pedies” l va fora su **Trentino Tv – canal 10 Prov. de TN-** vigni sabeda da les 18.00 (sie da sera), de domenia da les 13.30 (mesa la does domesdi) e de lunesc da les 11.30 (mesa les doudesc).

L program ades l va fora ence sun **AltoAdige TV – canal 11 de BZ** - vigni domenia da les 18.00 (sie da sera).

Se pel veder duta la puntates ence sul canal YouTube de TV Ladina sot chest link:

<https://www.youtube.com/@TvLadina>

opuramenter se pel veder i servijes un a un su la piata Facebook de TV Ladina

<https://www.facebook.com/TelevijionLadina>

Traduzion di Servijes Linguistics e Culturèi del Comun general de Fascia

(cdt)